

## REGULAMENTO DE PRIMARIAS PARA A ELECCIÓN DO CONSELLO DAS MAREAS

### ARTIGO 1. OBXECTO

1. O presente Regulamento ten por obxecto regulamentar o proceso de elección do Consello da Marea contemplado no documento de Organización Interna aprobado na Marea Constituínte do 30 de Xullo de 2016.
2. O Regulamento foi elaborado pola Coordinadora Provisional de En Marea e aprobado polo Plenario de En Marea do 17 de decembro de 2016

### ARTIGO 2. CALENDARIO DE PRIMARIAS

O calendario das primarias para a elección do Consello da Marea será o seguinte:

- Venres 9 de decembro: Apertura do prazo para a inscrición no censo.
- Sábado 10 de decembro: Presentación do documento de regulamento de primarias para a elección do consello das mareas
- Sábado 10 de decembro: Apertura do prazo para a presentación de emendas ao regulamento de primarias para a elección do consello das mareas
- Xoves 15 de decembro: peche do prazo para presentación de emendas ao regulamento.
- Sábado 17 de decembro: Celebración do Plenario no que se aprobará o Regulamento.
- Martes 10 de xaneiro, 10:00 horas: Apertura do prazo de presentación de candidaturas e do prazo para solicitar o voto telemático non presencial.
- Venres 13 de xaneiro, 23:59 horas: peche do prazo de presentación de candidaturas
- Sábado 14 de xaneiro : proclamación provisional das candidaturas e apertura do prazo de 24 horas desde a súa publicación para a subsanación de erros e/ou presentación de reclamacións.
- Luns 16 de xaneiro: resolución de reclamacións por parte do comité electoral e proclamación definitiva de candidaturas.
- Martes 17 de xaneiro, 00:00 horas: Inicio da campaña electoral.
- Xoves 19 de xaneiro, 23:59 horas: remate do prazo para inscribirse no censo e ter dereito a voto nas primarias e remate do prazo para solicitar o voto telemático non presencial.
- Venres 20 de xaneiro, 23:59 horas: remate da campaña electoral.
- Sábado 21 de xaneiro, 09:00 horas: inicio do período de votación nas primarias.
- Domingo 22 de xaneiro, 23:59 horas: remate do período de votacións.
- Luns 23 de xaneiro: proclamación provisional de resultados e apertura dun prazo de 48 horas para reclamacións.
- Mércores 25 de xaneiro: proclamación definitiva de resultados e das persoas integrantes do Consello das Mareas.
- Sábado 28 de xaneiro: Constitución do Consello das Mareas.

### ARTIGO 3. DEREITO AO VOTO

1. Terá dereito ao voto toda persoa maior de 18 anos á data de peche do censo (Xoves 19 de xaneiro 2017) que resida, ou residise nalgún momento nos últimos cinco anos en Galicia e formalice a súa inscrición no censo antes das 23:59 horas do Xoves 19 de xaneiro de 2017.
2. Todas as persoas que conformaron o censo de primarias para as eleccións ao Parlamento de Galicia de 25 de Setembro de 2016 recibirán no enderezo electrónico facilitado para ese proceso unha ligazón para formalizar, de reunir e acreditar os requisitos necesarios, a súa inscrición no novo censo.
3. Todas as persoas deberán probar que residen ou residiron en Galicia mediante algún dos seguintes documentos: DNI con enderezo en Galicia, certificado ou volante de empadramento ou factura de fornecementos (auga, luz ou teléfono) onde consten o nome do titular e o enderezo. No caso das persoas migradas será preciso un documento que recolla o seu lugar de orixe e o momento de chegada ao seu actual lugar de residencia (a inscrición no CERA). Todas as persoas terán que achegar esta documentación para o novo proceso.
4. No caso do voto presencial a documentación presentárase no intre de exercer o dereito de voto. No caso de voto a distancia, terán que achegar esa documentación na forma definida polo Comité Electoral e publicada na páxina web entre as 10:00 horas do luns 10 de xaneiro e as 23:59 horas do xoves 19 de xaneiro de 2017.
5. Por esixencias da aplicación telemática elixida, todas as persoas inscritas terán que achegar un número de teléfono móbil para poder exercer o seu dereito ao voto.
6. En Marea obrígase a garantir o segredo do voto e ao cumprimento da Lei Orgánica 15/1999, de 13 de decembro, de Protección de Datos de Carácter Persoal.

#### **ARTIGO 4. CENSO**

1. O censo de votantes para as Primarias do Consello da Marea será elaborado *ex novo* polo Comité Electoral.
2. A inscrición para a participación neste proceso electoral pecharase as 23:59 horas do xoves 19 de xaneiro de 2017.
3. O censo das Primarias para o Consello da Marea non se fará público e só será coñecido polas persoas integrantes do Comité Electoral e a equipa técnica da aplicación telemática que se empregará para exercer o voto.

#### **ARTIGO 5. CANDIDATURAS AO CONSELLO DA MAREA**

1. **Requisitos para presentar unha candidatura:**
  - a) **Requisitos colectivos como candidatura**
    1. As candidaturas estarán conformadas como mínimo por tantas persoas como postos a cubrir (35) máis un número indeterminado de suplentes ata un máximo de 35.

2. As candidaturas irán ordenadas de xeito prelado e en cumprimento do criterio de xénero, segundo o sistema denominado “cremalleira”.

3. As candidaturas garantirán o equilibrio territorial de xeito que en cada tramo de 8 persoas terá que haber como mínimo 1 persoa candidata de cada unha das 4 provincias. As 3 últimas persoas candidatas non poderán ser todas da mesma provincia. No caso de existir suplencias, aplicarase o mesmo criterio contando desde o primeiro ao trixésimo quinto posto das suplencias.

4. As candidaturas deberán estar en posesión dos avais establecidos no presente Regulamento.

5. As candidaturas deberán presentar xunto coa lista de candidatas un documento político que conteña unha proposta de liñas de actuación no Consello. Sempre no marco dos acordos políticos do Plenario do 17 de decembro e os principios da Marea Constituínte, que incluírá as liñas relativas aos traballos a desenvolver pola organización orientados á I Asemblea, con proposta dun horizonte temporal para a súa realización. Así mesmo, conterá unha proposta de composición da coordinadora.

6. As candidaturas presentarán xunto co resto da documentación a súa denominación e imaxe gráfica. A denominación evitará incluír o nome de calquera marea municipalista ou organización política.

7. As candidaturas designarán, no intre da súa presentación, unha persoa que exercerá as labores de representante xeral da mesma diante do comité electoral.

#### **b) Requisitos individuais das persoas candidatas**

Para formar parte dunha candidatura as Primarias as persoas candidatas terán que estar en posesión dos seguintes requisitos no intre de se rexistrar a candidatura:

1. Estar inscrita no censo das Primarias para o Consello da Marea.
2. Manifestar por escrito un compromiso de cumprimento do Código Ético de En Marea, así como dos Principios e Documentos aprobados na Marea Constituínte e no Plenario.
3. Cumprimentar o formulario de aceptación da súa inclusión na candidatura.
4. Asinar unha declaración xurada de non estar incurso en ningunha das causas de exclusión.
5. Manifestar por escrito un compromiso de renuncia a calquera cargo que sexa considerado incompatible no caso de seren electa membro do Consello da Marea.

## **2. Criterios de exclusión**

### **a) Criterios de exclusión das candidaturas no seu conxunto:**

1. Serán excluídas todas as candidaturas que non cumpran cos requisitos esixidos en todos os puntos do apartado 5.I do presente Regulamento e non subsanen en tempo e forma os erros detectados polo Comité Electoral.

2. Serán excluídas aquelas candidaturas cuxo documento político non se axuste ao desenvolvemento das liñas aprobadas pola Marea Constituínte e o Plenario. A estes efectos o Comité Electoral poderá derivar á Coordinadora Provisional a decisión sobre este criterio.

3. Serán excluídas aquelas candidaturas cuxa denominación ou imaxe gráfica conteña referencias a calquera organización política ou marea municipalista ou ao conxunto de En Marea. A estes efectos o Comité Electoral poderá derivar á Coordinadora Provisional a decisión sobre este criterio.

### **b) Criterios de exclusión das persoas candidatas**

1. Incumprir calquera dos requisitos sinalados no artigo 5.1 b) do presente Regulamento.
2. Atoparse en calquera das situacións sinaladas nos artigos 5.3, 5.4 e 5.5 do Regulamento de Primarias Abertas de En Marea para as eleccións ao Parlamento de Galicia do 25 de setembro de 2016.

### **3. Incompatibilidades**

**Non foi posible acadar un acordo na redacción do presente apartado. Polo que neste documento se recollen as dúas liñas de opinión maioritarias dentro da coordinadora**

#### **LIÑA 1**

Non poderán concorrer como candidatas para o Consello da Marea as persoas que ostentan a condición de membro do Comité Electoral, co obxectivo de garantir a independencia do órgano rector do proceso.

Non poderán pertencer ao Comité Electoral aquelas persoas que formen parte dunha candidatura.

#### **LIÑA 2**

- Non poderán concorrer as eleccións para o Consello da Marea aquelas persoas que formen parte do comité electoral.
- Non poderán concorrer as eleccións para o Consello da Marea aquelas persoas que ostenten a condición de deputada, tanto no Parlamento de Galicia como no Congreso das Deputadas e o Senado.
- Poderán concorrer as eleccións para o Consello as persoas que posúan a condición de membro do órgano executivo de dirección dunha organización política ou ocupen unha responsabilidade executiva dentro da mesma (secretarías xerais, voceirías, etc). Neste caso a incompatibilidade producirase no momento da elección, debendo a persoa afectada pola mesma optar entre un e outro cargo.

#### **Membros natos**

- O Grupo Parlamentario de En Marea no Parlamento de Galicia designará, de entre os seus membros, a 5 persoas (excluída quen exerza a portavocía) que farán parte do Consello da Marea con voz e sen voto. Esta designación terá efecto por un período de 6 meses, sendo logo aplicada a rotación.
- O Grupo Parlamentario de En Marea nas Cortes Xerais (Congreso e Senado) designará, de entre os seus membros, a 1 persoa (excluída quen exerza a portavocía no Congreso) que fará parte do Consello da Marea con voz e sen voto. Esta designación terá efecto por un período de 6 meses, sendo logo aplicada a rotación.

- As persoas que ostenten a condición de portavoces dos Grupos Parlamentarios no Parlamento de Galicia e no Congreso farán parte do Consello da Marea e da Coordinadora con voz e voto en tanto ostenten a amentada condición.
- 4. O Comité Electoral porá a disposición de toda a cidadanía os formularios oficiais correspondentes, que deberán ser presentados, logo de ser cumprimentados, a través do enderezo electrónico [primariasgalegas@enmarea.gal](mailto:primariasgalegas@enmarea.gal), dentro do prazo de presentación de candidaturas.

## **ARTIGO 6. AVAIS PARA PRESENTARSE ÁS PRIMARIAS DO CONSELLO DA MAREA**

1. Terán a condición de avalistas todas as persoas inscritas no censo de En Marea nas condicións recollidas no presente Regulamento na data de peche de presentación de candidaturas.
2. Cada avalista poderá avalar unha única candidatura e nunca a aquela da que forme parte, quer como titular, quer como suplente.
3. Os avais deberán ser formalizados empregando o formulario oficial e entregaranse acompañados do DNI da persoa avalista escaneado.
4. Correspóndelle ao Comité Electoral validar os avais entregados en tempo e forma segundo establece o presente Regulamento.
5. No caso de que o Comité Electoral detecte que unha mesma persoa avala a máis de unha candidatura, comunicarllo á representante xeral da candidatura por correo electrónico, ao tempo que se fai pública a relación de candidaturas, debendo a representante xeral corrixir o erro antes da proclamación definitiva.
6. Para presentar unha candidatura, deberanse reunir 100 avais (nin máis, nin menos) cun mínimo de 20 por provincia.
7. Os avais, xunto co resto de documentación entregada polas candidaturas, serán custodiados polo Comité Electoral.

## **ARTIGO 7. VOTACIÓN**

1. A circunscrición para a elección do Consello da Marea é a nacional.
2. A persoa electora deberá votar unicamente a unha das candidaturas que se presenten.
3. No caso de existir unha única candidatura, poderase votar por esta ou en branco.
4. O voto poderá exercerse baixo dúas modalidades, presencial ou a distancia:
  - Presencial: o voto será telemático, de maneira privada ou de maneira asistida, nun espazo adaptado a tal efecto no que se votará a través dun computador. O Comité Electoral intentará que existan mesas presentes no maior número de concellos posíbeis, en función da dispoñibilidade de locais, días e horas. A ubicación das mesas comunicárase a través da web antes das xornadas de votación. Cada mesa contará cun mínimo de tres persoas designadas polo Comité Electoral para garantir a limpeza do proceso e facilitar a votación, sen que en

ningún caso poidan orientar de calquera xeito o sentido do voto. As persoas que desexen exercer o dereito a voto deberán acreditar a súa identidade e residencia en Galicia na mesa electoral.

- A distancia: as persoas electoras que prevean non poder exercer presencialmente o seu dereito ao voto, poderán emitilo na modalidade telemática a distancia, previa solicitude ao Comité Electoral entre o 10 e o 19 de xaneiro mediante formulario habilitado ao efecto na páxina web e acreditando debidamente a súa identidade e residencia en Galicia.
5. A maiores das condicións de seguridade que oferta a ferramenta telemática, o Comité Electoral velará pola seguridade do proceso.

## **ARTIGO 8. SISTEMA DE RECONTO E PROCLAMACIÓN DO CONSELLO**

1. O sistema de recuento será proporcional puro entre as distintas candidaturas que concurran, de tal xeito que serán proclamadas electas as persoas que ocupen, segundo a orde prelada da lista presentada, os postos que a cada candidatura lle correspondan conforme ao reparto proporcional puro.
2. O Consello resultante desta votación deberá respectar na súa composición a cifra máis aproximada á paridade de xénero (50%). No caso de que, conforme ao sistema de recuento, o resultado das votacións non reflecta esta composición, aplicarase un sistema de corrección do seguinte xeito: serán substituídas as últimas persoas de cada lista pertencentes ao xénero sobrerrepresentado en ser elixidas pola seguinte do outro xénero na súa lista, tendo que operar a corrección naquela candidatura que obtivese un menor número de votos en relación con outras que tivesen desequilibrio de xénero. No caso de ter que aplicar en máis dun caso a corrección, seguirase o criterio do número de votos obtidos polas candidaturas. En caso de producirse un empate, resolverase por sorteo.
3. Os resultados provisionais serán publicados na páxina web o Luns 23 de xaneiro, abríndose un prazo de 24 horas desde a publicacións para as reclamacións, que serán resoltas polo Comité Electoral.
4. Os resultados definitivos serán proclamados en sesión pública o Mércores 25 de xaneiro: de 2017, expedindo o Comité Electoral a credencial de nomeamento de cada unha das 35 persoas electas para o Consello da Marea.
5. O Consello da Marea reunirase en sesión constituínte o sábado 28 de xaneiro de 2017, as 12:00 horas.

## **ARTIGO 9. O COMITÉ ELECTORAL**

1. O Comité Electoral está formado polas 11 persoas escollidas na Asemblea constituínte do 30 de xullo en Vigo.
2. As persoas que forman parte do Comité Electoral non poderán ser candidatas no proceso, nin facer campaña, exercer como avalistas ou solicitar o voto para ningunha candidatura.
3. O Comité Electoral terá as seguintes atribucións durante o desenvolvemento do proceso electoral:
  - Garantir o cumprimento deste Regulamento.
  - Poñer ao dispor das persoas interesadas os formularios correspondentes para todos os trámites necesarios para o proceso.

- Garantir a igualdade de oportunidades.
- Aprobar e proclamar as candidaturas presentadas.
- Resolver as distintas queixas, denuncias e irregularidades que se presenten durante o proceso.
  
- Revisar os avais e a documentación acreditativa da identidade e residencia das persoas censadas.
- Elaborar un documento de consideracións e recomendacións dos límites para levar a cabo a campaña electoral, que será de obrigado cumprimento por parte das candidaturas
- Designar e formar as persoas que actuarán como asistentes e interventoras durante o proceso de votación telemática asistida, quedando excluídas as persoas que formen parte dalgunha candidatura.
- Validar ou anular os avais presentados.
- Validar ou anular as candidaturas presentadas.
- Elaborar resolucións a respecto dos conflitos e queixas que se podan producir nas inscricións, o contido dos avais e candidaturas.
- Interpretar baleiros do presente regulamento.
- Realizar a corrección de xénero e territorial sobre o resultado final.

4.O Comité Electoral adoptará as súas decisións por consenso. No caso de non existir este, por maioría de 2/3 e, de non acadarse esta, por maioría simple.